

重修棗陽縣志卷之六

官蹟

漢

蒯越字異度南郡中廬人蒯通之後也深中足智魁傑有雄姿大將軍何進聞其名辟爲東曹掾越勸進誅諸閹官進猶豫不決越知進必敗求出爲汝陽令初平元年劉表爲荊州刺史延越與共謀議時江南宗賊大盛表謂越曰宗賊雖盛而衆不附若袁術因之禍必至矣吾欲徵兵恐不能集其策焉出對曰理平者先仁義理亂者先權謀兵不在多貴乎得

重修棗陽縣志

卷之六

官蹟 漢

一

人袁術驕而無謀宗賊率多貪暴越有所素養者使人示之
呂利必持衆來使君誅其無道施其才用威德旣行襁負而至矣兵集衆附南据江陵北守襄陽荊州八郡可傳檄而定
公路雖至無能爲也表曰善舅犯之謀也遂使越遣人誘宗
賊帥至者十五人皆斬之而襲取其衆唯江夏賊張虎陳坐
擁兵據襄陽城表使越與龐季往譬之乃降江南悉平表得
以疆大曹操征表未至表病死越等說表子琮歸降操承制
拜越章陵太守封樊亭侯與荀彧書曰不喜得荊州喜得蒯
異度耳歷官至光祿勳建安十九年卒

三國

趙儼字伯然潁川陽翟人也避亂荊州與杜襲繁欽通財同計合爲一家太祖始迎獻帝都許儼謂欽曰曹鎮東應期命世必能匡濟華夏吾知歸矣建安二年年二十七遂扶持老弱詣太祖太祖以儼爲朗陵長縣多豪猾無所畏忌儼取其尤甚者收縛案驗皆得死罪儼旣囚之乃表府解放自是威恩並著時袁紹舉兵南侵遣使招誘豫州諸郡諸郡多受其命惟陽安郡不動而都尉李通急錄戶調儼見通曰方今天下未集諸郡並叛懷附者復收其綿絹小人樂亂能無遺恨

重修棗陽縣志

卷之六

官蹟

三國

二

且遠近多虞不可不詳也通曰紹與大將軍相持甚急左右郡縣背叛乃爾若縣絹不調送觀聽者必謂我願望有所須待也儼曰誠亦如君慮然當權其輕重小緩調當爲君釋此患乃書與荀彧曰今陽安郡當送絲絹道路艱阻必致寇害百姓困窮鄰城並叛易用傾蕩乃一方安危之機也且此郡人執守忠節在險不貳微善必賞則爲義者勸善爲國者藏之於民以爲國家宜垂慰撫所歛絲絹皆俾還之彧報曰輒白曹公公聞下郡絲絹悉以還民上下歡喜郡內遂安入爲司空掾屬主簿時于禁屯潁陰樂屯進陽翟張遼屯長社諸將

任氣多共不協使儼并參之每事訓諭遂相親睦太祖征荊州以儼領章陵太守

後魏

桓叔與其先譙國龍亢人祖玄叛晉西奔至枚迴洲被殺父誕字天生時年數歲流竄大陽蠻中遂習其俗及長多智謀爲羣蠻所歸延興三年擁沔水以北滄葉以南八萬餘落內屬拜東荊州刺史襄陽王太和十六年依例降爲公卒謚曰剛兒暉字道進襲父爵仍爲東荊州刺史叔興初爲太守前後招慰大陽蠻歸附者一萬七百戶請置郡十六縣五十詔

重修棗陽縣志

卷之六

宦蹟

後魏

三

前鎮東府長史酈道元檢行置之延昌元年拜南荊州刺史居安昌隸於東荊三年梁遣兵破掠諸蠻百姓擾動蠻自相率二萬餘人頻請統帥蠻以爲聲勢叔興給一統并威儀爲之節度蠻人遂安其年梁雍州刺史蕭藻遣將寇南荊之西南六月叔興與梁叛蠻龍驤將軍樊石廉大破之於九山斬其虎旅將軍新豐縣開國子蔡令孫冠軍駢席世興貞義將軍藍次孫藻又遣新陽太守邵道林於沔水之南石城東北立清水戍爲抄掠之基叔興遣諸蠻擊破之四年叔興上表請不隸東荊許之梁人每有寇抄叔興必摧敗之迨肅宗朝

靈太后專制委用非人賞罰乖舛正光二年五月辛巳叔興驅掠城民叛入於梁梁資以兵糧令築谷陂城以立洛州逼土山戍詔以尚書左丞李暉爲行臺持節督諸軍討之乘勝拔谷陂叔興退走由是南荆始荒毀焉

李志字鴻道頓邱衛國

一作臨黃

人博學有才幹年十餘歲便能

屬文父彪甚奇之謂崔鴻曰子宜與鴻道爲二鴻於洛陽鴻遂與志交欵往來志後稍遷符璽郎中徐州平東府司馬以軍功累轉後軍將軍中散大夫輔國將軍永寧寺典作副將志所在著績桓叔興外叛南荆荒毀領軍元乂舉其才任撫重修棗陽縣志

卷之六

宦蹟 後魏

四

導擢爲南荆州刺史爾朱榮廢立魏國大亂適梁武帝子纘居襄陽拜表北伐剋平南陽新野等郡南荆孤立六月辛卯志遂據城降於梁

韋肅字遵顯京兆杜陵人少有志業年十八辟州主簿時屬歲儉肅以家粟造粥以飼饑人所活甚眾解褐太學博士遷祕書郎中稍遷左軍將軍爲荆郢和糴大使南郢州刺史田夷啓稱肅父珍往任荆州恩洽夷夏乞肅充南道別將領荆州驍勇共爲腹背詔從之未幾行南荆州事後以功封杜縣開國子永安三年卒謚曰宣

李愨字魔憐趙郡柏人八也形貌魁傑見異於時少有大志年四十猶不仕州郡唯招致姦俠以爲徒侶孝昌之末天下兵起愨潛居林慮山觀候時變賊帥鮮于修禮毛普賢作亂詔遣大都督長孫稚討之稚素聞愨名召兼帳內統軍軍達呼陲賊來逆戰稚軍爲賊所敗愨遂歸家安樂王元鑒爲北道大行臺至鄴以賊衆盛彊未得前遣使徵愨表授武騎常侍假節別將鎮鄴城東郭葛榮之圍信都餘黨南抄陽平以北皆爲賊有鑒命愨爲前驅別討之頗有斬獲及鑒謀逆愨乃詐患暴風鑒信之因此得免未幾大都督源子邕屯安陽

重修棗陽縣志

卷之六

官蹟

後魏

五

大都督裴衍屯鄴城西討鑒愨棄家日奔子邕仍被徵赴洛除奉車都尉持節鎮汴河汴河在鄴之西北重山之中并相二州交境以葛榮南逼故用愨鎮之榮遣其叔樂陵王葛萇率精騎一萬擊愨愨據險拒戰萇不得前爾朱榮至東關愨乃見榮榮欲分賊勢遣愨別道向襄國襲賊署廣州刺史田怙軍愨未至襄國已擒葛榮卽表授愨建忠將軍分廣平易陽襄國南趙郡之中丘三縣爲易陽郡以愨爲太守賜爵襄國侯永安末假平北將軍持節當郡大都督遷樂平太守未之郡洛京傾覆愨率所部西保石門山潛與幽州刺史劉靈

助及高昇兄弟安州刺史盧曹等同契義舉助敗愍遂入石
門高祖建義以書招愍愍奉書擁眾數千人以赴高祖高祖
親迎之除使持節征南將軍都督相州諸軍事相州刺史兼
尙書西南道行臺當州都督令愍率本眾西還舊鎮高祖親
送之愍至鄉據馬鞍山依險爲壘徵糧集兵以爲聲勢爾朱
兆出井陘高祖破兆於廣阿愍統其本眾屯故城以備爾朱
兆相州旣平命愍還鄴除西南道行臺都官尙書復屯故城
爾朱兆等將至高祖徵愍參守鄴城大昌初除太府卿後出
爲南荊州刺史當州大都督此州自孝昌以來舊路斷絕前

重修棗陽縣志

卷之六

宦蹟 後魏

六

後刺史皆後間道始得達州愍勒部曲數千人徑向懸瓠從
比陽復舊道且戰且前三百餘里所經之處卽立郵亭蠻左
大服梁遣其南司州刺史任思禮隨郡太守桓和等率馬步
三萬兼發邊蠻圍逼下澁戍愍躬自討擊破之詔加車騎將
軍愍於州內開立陂渠溉稻千餘頃公私賴之俄遷東荊州
刺史孝靜帝天平二年卒

梁

周宏直字思方汝南安城人幼而聰敏解褐梁太學博士稍
遷西中郎湘東王外兵記室參軍與東海鮑泉南陽宗懔平

原劉緩沛郡劉毅同掌書記入爲尙書儀曹郎湘東王出鎮江荆二州累除錄事諮議參軍帶柴桑當陽二縣令及梁元帝承制授假節英果將軍世子長史尋除智武將軍衡陽內史遷貞毅將軍平南長史長沙內史行湘州府州事湘濱縣侯邑六百戶歷邵陵零陵太守雲麾將軍昌州刺史王琳之舉兵也宏直在湘州琳敗乃還朝天嘉中歷國子博士廬陵王長史尙書左丞領羽林監中散大夫秘書監掌國史遷太常卿光祿大夫加金章紫綬太建七年遇疾且卒乃遺疏勅其家曰吾今年以來筋力減耗可謂衰矣而好生之情曾不

重修棗陽縣志

卷之六

宦蹟 梁

七

自覺唯務行樂不知老之將至今時制云及將同朝露七十餘年頗經稱足啓手告全差無遺恨氣絕已後便買市中見材材必須小形者使易提挈歛以時服古人通制但下見先人必須備禮可著單衣裙衫故履旣應侍養宜備紛帨或逢善友又須香煙棺內唯安白布手巾龕香爐而已其外一無所用卒于家時年七十六有集二十卷

西魏

魯超明蔡陽蠻王也魏自孝昌後二荆西郢蠻大擾動百姓多罹其害連年攻討散而復合其暴滋甚宇文泰畧定伊瀍

聲教南被諸蠻畏威靡然向風矣大統五年超明舉部內屬授南雍州刺史仍世襲焉先是正光中蠻王文武龍請降詔褒慰之亦拜南雍州刺史魯陽侯

辛慶之字慶之隴西狄道人也世爲隴右著姓父顯崇馮翊郡守贈雍州刺史慶之少以文學徵詣洛陽對策第一除秘書郎屬爾朱氏作亂魏孝莊帝令司空楊津爲北道行臺節度山東諸軍以討之津啓慶之爲行臺左丞典參謀議至鄴聞孝莊帝暴崩遂出充冀間謀結義徒以赴國難尋而節閔帝立乃還洛陽普泰二年遷平北將軍大中大夫及賀拔岳

重修棗陽縣志

卷之六

宦蹟

西魏

八

爲行臺復啓慶之爲行臺吏部郎中開府掾尋除雍州別駕大統初加車騎將軍俄遷衛大將軍左光祿大夫後太祖東討爲行臺左丞時初復河南以本官兼鹽池都將四年東魏攻正平郡陷之遂欲經畧鹽池慶之守禦有備乃引軍退河橋之役大軍不利河北守令棄城走慶之獨因鹽池抗拒疆敵時論稱其仁勇六年行河東郡事九年入爲丞相府右長史兼給事黃門侍郎除度支尙書復行河東郡事遷通直散騎常侍南荊州刺史加儀同三司慶之位遇雖隆而率性儉素車馬衣服亦不尙華侈志量淹和有儒者風度特爲當時

所重又以其經明行修令與盧誕等教授諸王魏廢帝二年拜秘書監尋卒於位

郭賢字道因趙興陽州人也父雲涼州司馬賢性彊記學涉經史魏正光末賊帥宿勤明達圍逼幽州刺史畢暉補賢統軍與之拒守後爲州主簿行北地郡事以征討有功授都督大統二年齊神武襲陷夏州太祖慮其南下與朝臣議之賢進曰高歡兵士雖眾智勇已竭策其舉措必不敢遠來昔賀拔公初薨關中震駭而歡不能因利乘便進取雍州是其無智及鑿駕西遷六軍寡弱毛鴻賓喪敗關門不守又不能乘

重修棗陽縣志

卷之六

宦蹟

西魏

九

此危機以要一戰是其無勇今上下同心士民戮力歡志沮喪寧敢送死且幽夏荒阻千里無煙縱欲南侵資糧莫繼以此而言不來必矣齊神武後果退如賢所策尋加伏波將軍從王思政鎮弘農授使持節行義州事當州都督轉行弘農郡事賢質直有算略思政甚重之禦邊之謀多與賢參決十二年除輔國將軍南荊州刺史及侯景來附思政遣賢先出三鷗鎮於魯陽加大都督封安武縣子邑四百戶尋進車騎大將軍儀同三司加散騎常侍及潁川被圍東魏遣蠻酋魯和扇動羣蠻規斷鷗路和乃遣其從弟與和爲漢廣郡守率

其部曲侵擾州境賢密簡士馬輕往掩襲大破之遂擒魯和
既而潁川陷權景宣等並拔軍西還自魯陽以東皆陷東魏將
彭樂因之遂來攻逼賢撫循將士咸爲盡其力用樂不能克
乃引軍退而東魏又以士民韋默兒爲義州刺史鎮父城以
逼賢賢又率軍攻默兒擒之賢在官雖無明察之譽以廉平
待物去後頗亦見思天和元年卒贈少保謚曰節

後周

席固字子堅其先安定人也高祖衡因後秦之亂寓居於襄
陽仕晉爲建威將軍遂爲襄陽著姓固少有遠志內明敏而

重修棗陽縣志

卷之六

宦蹟

後周

十

外質朴梁大同中爲齊興郡守屬侯景渡江梁室大亂固久
居郡職士多附之遂有親兵千餘人梁元帝嗣位江陵遷興
州刺史於是軍民慕從者至五千餘人因遂欲自據一州以
觀時變後懼王師進討方圖內屬密謂其腹心曰今梁氏失
政揚都覆沒湘東不能復讐雪恥而骨肉相殘宇文丞相勸
啓霸基招攜以禮吾欲決意歸之與卿等共圖富貴左右聞
固言未有應者固更諭以禍福諸人然後同之魏大統十六
年以地來附是時太祖方欲南取江陵西定蜀漢聞固之至
甚禮遇之乃遣使就拜使持節驃騎大將軍開府儀同三司

大都督侍中豐州刺史封新豐縣公邑二千戶後轉湖州刺史固以未經朝謁遂蒙榮授心不自安啓求入覲太祖許之及固至太祖與之歡醺賞賜甚厚進爵靜安郡公增邑并前三千三百戶尋拜昌歸憲三州諸軍事昌州刺史固居家孝友爲州里所稱涖官之處頗有聲績保定四年卒於州時年六十一贈大將軍襄唐豐郢復五州刺史謚曰肅仍敕襄州賜其墓田

李昶頓丘臨黃人也小名那昶彪名重魏朝爲御史中尉父遊亦有才行爲當世所稱遊兄志爲南荊州刺史遊隨從至

重修棗陽縣志

卷之六

官蹟

後周

七

州屬爾朱之亂與志俱奔江左昶性峻急不雜交遊幼年已解屬文有聲洛下時洛陽初置明堂昶年十數歲爲明堂賦雖優洽未足而才制可觀見者咸曰有家風矣初謁太祖昶祖深奇之厚加資給令入太學太祖每見學生必問才行於昶昶神情清悟應對明辨太祖每稱歎之綬德公陸通盛選僚案請以昶爲司馬太祖許之昶雖年少通特加接待公私之事咸取決焉又兼二千石郎中典儀注累遷都官郎中相州大中正丞相府東閣祭酒中軍將軍銀青光祿大夫昶雖處郎官太祖恒欲以書記委之於是以昶爲丞相府記室參

軍著作郎修國史轉大行臺郎中中書侍郎頃之轉黃門侍郎封臨黃縣伯邑五百戶太祖嘗謂昶曰卿祖昔在中朝爲御史中尉卿操尚貞固理應不墜家風但孤以中尉彈劾之官愛憎所在故未卽授卿耳然此職久曠無以易卿乃奏昶爲御史中尉歲餘加使持節車騎大將軍儀同三司賜姓宇文氏六官建拜內史下大夫進爵爲侯增邑五百戶遷內史中大夫世宗初拜御伯中大夫武成元年除中外府司祿保定初進驃騎大將軍開府儀同三司二年轉御正中大夫時以近侍清要盛選國華乃以昶及安昌公元則中都公陸逞

重修棗陽縣志

卷之六

官蹟 後周

三

臨淄公唐瑾等並爲納言尋進爵爲公增邑通前一千三百戶五年出爲昌州刺史在州遇疾啓求入朝詔許之還未至京卒于路時年五十贈相瀛二州刺史昶於太祖世已當樞要兵馬處分專以委之詔冊文筆皆昶所作也及晉公護執政委任如舊昶常曰文章之事不足流於後世經邦致治庶及古人故所作文筆了無藁草唯畱心政事而已

唐瑾字附璘父永性溫恭有器量博涉經史雅好屬文身長八尺二寸容貌甚偉年十七周文帝聞其名乃貽永書曰聞公有二子曰陵從橫多武略瑾雍容富文雅可並遣入朝孤欲

委以文武之任因召拜尚書員外郎相府記室參軍事軍書
羽檄瑾多掌之從破沙苑戰河橋並有功封姑臧縣子累遷
尚書右丞吏部郎中于時魏室播遷庶務草創朝章國典瑾
並參之遷戶部尚書進位驃騎大將軍開府儀同三司賜姓
宇文氏時燕公于謹勲高望重朝野所屬自文帝言瑾學行
兼修願與之同姓結爲兄弟庶子孫承其餘論有益義方文
帝嘆異者久之更賜瑾姓萬紐于氏瑾乃深相結納敦長幼
之序謹亦庭羅子孫行弟姪之敬其爲朝望所宗如此進爵
臨淄縣伯轉吏部尚書銓綜衡流雅有人倫之鑒以父憂去

重修棗陽縣志

卷之六

宦蹟

後周

三

職尋起令視事時六尚書皆一時之秀文帝自謂得人號爲
六俊然瑾尤見器重于謹南伐江陵以瑾爲元帥府長史軍
中謀略多出瑾焉論平江陵功進爵爲公六官建授禮部中
大夫出爲蔡州刺史歷柘州硤州所在皆有德化人吏稱之
轉荊州總管府長史入爲吏部中大夫歷御正納言中大夫
曾未十旬遂遷四職搢紳以爲榮久之除司宗中大夫兼內
史尋卒于位贈小宗伯謚曰方

薛端字仁直河東汾陰人也本名沙陁魏雍州刺史汾陰侯
辨之六世孫代爲河東著姓端少有志操遭父憂居喪合禮

與弟裕勵精篤學不交人事年十七司空高乾辟爲參軍賜
爵汾陰縣男端以天下擾亂遂棄官歸鄉里魏孝武西遷太
祖令大都督薛崇禮據龍門引端同行崇禮尋失守遂降東
魏東魏遣行臺薛循義都督乙千貴率衆數千西度據楊氏
壁端與宗親及家僮等先在壁中循義乃令其兵逼端等東
度方欲濟河會日暮端密與宗室及家僮等叛之循義遣騎
追端且戰且馳遂入石城柵得免柵中先有百家端與并力
固守貴等數來慰諭知端無降意遂拔還河東東魏又遣其
將賀蘭儀南汾州刺史薛琰達守楊氏壁端率其屬并招諭

重修棗陽縣志

卷之六

官蹟

後周

南

村民第多設竒以臨之懿等疑有大軍便卽東遁爭船溺死
者數千人端收其器械復還楊氏壁太祖遣南汾州刺史蘇
景恕鎮之降書勞問徵端赴闕以爲大丞相府戶曹參軍從
擒竇泰復弘農戰沙苑並有功加冠軍將軍中散大夫進爵
爲伯轉丞相東閣祭酒加本州大中正遷兵部郎中大統十
六年大軍東討柱國李弼爲別道元帥妙簡首僚數日不定
太祖謂弼曰爲公思得一長史無過薛端弼對曰眞其才也
乃遣之加授車騎大將軍儀同三司轉尙書左丞仍掌選事
進授吏部尙書賜姓宇文氏孝閔帝踐阼除工部中大夫轉

民部中大夫進爵爲公增邑通前一千八百戶晉公護將廢
帝召羣官議之端頗有同異護不悅出爲蔡州刺史爲政寬
惠民吏愛之尋轉基州刺史基州地接梁陳事藉鎮撫總管
史寧遣司馬梁榮催令赴任蔡州父老訴榮請畱端者千餘
人至基州未幾卒時年四十三遺誠薄葬府州贈遺勿有所
受贈本官加大將軍追封文成郡公謚曰質

蕭世怡名泰梁武帝弟鄱陽王恢之子也以名犯太祖諱故
稱字焉幼而聰慧頗涉經史梁時封豐城縣侯邑五百戶除
給事中轉太子洗馬出爲持節仁威將軍譙州刺史及侯景

重修棗陽縣志

卷之六

官蹟 後周

五

爲亂城陷被執尋遁逃得免至于江陵及平侯景元帝以世
怡爲太宰兼太常卿承聖二年授使持節平西將軍臨川內
史旋改授平南將軍桂陽內史未至郡改以爲郢州刺史湘
州刺史王琳襲世怡世怡以州輸琳時陳武帝執政徵爲侍
中不就後奔於齊除車騎大將軍散騎常侍尋出爲永州刺
史大將軍權景宣畧地河南世怡來歸欵拜使持節驃騎大
將軍開府儀同三司封義興郡公天和二年授蔡州刺史政
存簡惠不尚苛刻深爲吏民所安三年卒於州贈本官加并

洛永三州刺史

隋

袁憲字德章尚書左僕射樞之弟也幼聰敏好學有雅量梁武帝修建庠序別開五館其一館在憲宅西憲常招引諸生與之談論每有新議出人意表同輩咸嗟服焉大同八年武帝撰孔子正言章句詔下國學宣制旨義憲時年十四被召爲國子正言生謁祭酒到漑漑目而送之愛其神彩在學一歲國子博士周弘正謂憲父君正曰賢子今茲欲策試不君正曰經義猶淺未敢令試居數日君正遣門下客岑文豪與憲候弘正會弘正將登講坐畢集乃延憲入室授以麈尾命重修棗陽縣志

卷之六

宦蹟 隋

六

憲樹義時謝岐何妥在坐弘正謂曰二賢雖窮奧蹟得無憚此後生耶何謝於是遞起義端深極理致憲與往復數番酬對閑敏弘正謂妥曰恣卿所問勿以童稚所期時學眾滿堂觀者重沓而憲神色自若辯論有餘弘正請起數難終不能屈因告文豪曰卿還咨袁吳郡此郎已堪見代爲博士矣時生徒對策多行賄賂文豪請具束脩君正曰我豈能用錢爲兒買第耶學司銜之尋舉高第以貴公子選尚南沙公主卽梁簡文之女也大同元年釋褐秘書郎大清二年遷太子舍人侯景寇逆憲東之吳郡尋丁父憂哀毀過禮敬帝承制徵

元延祖河南灤州人後魏常山王遵十四代孫祖仁基從征
遼東以功拜甯塞令襲常山公父亨霍王元軌參軍事延祖
三歲而孤仁基敕其母曰此兒且祀我因名而字之逮長不
仕年過四十親姬彊勸之再調春陵丞輒棄官去曰人生衣
食可適飢飽不宜復有所須每灌畦掇薪以爲有生之役過
此吾不思也安祿山反召子結戒曰而曹逢世多故不得自
安山林勉樹名節無近羞辱云卒年七十六門人私謚曰太
和先生

錢起字仲文吳興人

一作吳郡人

善五言詩天寶十年就試試官

重修灤陽縣志

卷之六

官蹟

唐

六

李暉深嘉之登第後授秘書郎與郎士元齊名時稱前有沈
宋後有錢郎一時盧綸輩十人唱酬出入貴遊之門才名大
振形於圖畫嘗爲章陵令有赴章陵酬李卿贈別詩又有罷
章陵令山居過中峯道者詩俱見藝文其天懷澹蕩本無宦
情從可想見後終考功郎中有集十一卷

宋

趙方字彥直衡山人父棠少從胡宏學慷慨有大志嘗見張
浚於督府浚雅敬其才欲以右選官之棠不爲屈累以策言
兵事浚奇之命子栻與棠交方遂從栻學淳熙八年舉進士

調蒲圻尉疑獄多所委決授大甯監教授俗陋甚方擇可教者親誘訓之人皆感勵自是始有進士知青陽縣告其守史彌遠曰催科不擾是催科中撫字刑罰無差是刑罰中教化人以爲名言主管江西安撫司機宜文字京湖帥李大性辟知隨州南北初講和旱蝗相仍方親走四郊以禱一夕大雨蝗盡死歲大熟適和議成諸郡寢弛備方獨招兵擇將拔土豪孟宗政等補以官提舉京西常平兼轉運判官提點刑獄時劉光祖以耆德爲帥方事以師禮自言吾性太剛每見劉公使人更和緩嘗請光祖書勤謹和緩四字揭坐隅以爲戒

以金部員外郎召尋加直秘閣改湖北轉運判官兼知鄂州升直煥章閣兼權江陵府增修三海八匱以壯形勢進秘閣修撰知江陵府主管湖北安撫司使兼權荆湖置司時金偪於兵計其必南徙日夜爲備荆門有東西兩山險要方築堡其上增戍兵以遏其衝進右文殿修撰金樊快明謀歸宋追兵至襄陽方遣孟宗政扈再興以百騎邀之殺千餘人金人遁去權工部侍郎竇謨閣待制京湖制置使兼知襄陽府諜知金人決意犯境乃下防夏之令金相高琪及其樞密烏古論慶壽犯陳光化隨棗陽信陽均州方夜半呼其子范葵曰

朝廷和戰之說未定觀此益亂人意吾策決矣惟有提兵臨邊決戰以報國耳遂抗疏主戰親往襄陽金人圍棗陽急方遣宗政再興等援棗陽仍增戍光化信陽均州以聯聲勢已而棗陽守趙觀敗金人於城外再興宗政至與觀夾擊又敗之棗陽圍解方申飭諸將當遏於境上不可使之入而後拒之於城下時麥正熟方遣兵護民刈之令清野以俟再疏力陳不可和者七戰議遂定金將完顏賽不入境兵號十萬方部分諸將金人犯棗陽者宗政敗之於尙家川犯隨州者劉世興敗之於磨子平相持踰年方調世興移師與許國再興重修棗陽縣志

卷之六

官蹟 宋

三

援棗陽張興李雄韜援隨州隨州圍解再興等轉戰入棗陽時宗政守城伏兵城東金人遇伏敗走未幾再至再興又敗之自是無日不戰金人三面來攻宗政出東門再興出南門世興出北門大合戰敗之金人朝進莫退力不能捍諸將表裏合謀國自南山進張威自滾河進世興李琪出城與國會再興出城與威會犄角追擊金人遂潰化光守潘景伯亦設伏敗金人於趙家橋孟宗政又破之於隨州鴨兒山擒賽不妻弟王醜漢金人遂誅賽不方以功遷龍圖閣待制封長沙縣男賜食邑金人復大舉命訛可圍棗陽塹其外繞以土城

方計其空巢穴而來若擣其虛則棗陽之圍自解乃命國東向唐州再興西向鄧州又命子范葵監後殿時宗政在城中日夜鏖戰焚其攻具金人不敢近城西師由光化境出砦於三尖山拔順陽縣金人率眾仰攻大敗再興與國兩道並進掠唐鄧境焚其城柵糧儲棗陽城堅金頓兵八十餘日方知其氣已竭乃召國再興還併東師隸於再興尅期合戰再興敗金人於滾河又敗之城南宗政自城中出夾擊殺其眾三萬金人大潰詔可單騎遁獲其貲糧器甲不可勝計進方煥章閣直學士奏乞均官民軍兵廩給自備馬者倍之又奏使

重修棗陽縣志

卷之六

官蹟 宋

三

民兵夏歸以省月給秋復詣屯守禦從之方料金人數不得志於棗陽必將同時並攻諸城當先發以制之命國宗政出師向唐再興向鄧戒之曰毋深入毋攻城第潰其保甲燬其城砦空其貲糧而已宗政進破湖陽縣擒其千戶趙興兒國遣部將耶律均與金人戰於比陽戮其將李提控再興破高頭城大敗金兵遂薄鄧州唐州兵來援迎敗之降者踵至已而金兵至樊城方命再興陣以待之方視其師金人三日不敢動遂遁金將駙馬阿海犯河西樞密完顏小驢屯唐州爲後繼方先攻唐伐其謀及使再興發棗陽兵擊其西國發桐

柏兵擊其東再興敗金人於唐城斬小驢圍其城五匝垂下
會蘄黃繼陷詔趣方遣救方急命國保鄂再興援淮西國還
鄂州保江再興軍至蘄之靈山伺金人歸而擊之士豪祝文
蔚橫突入陣金人大敗國遣張寶將兵來會李全等兵亦至
金人遂潰再興追逐六十里擒其監軍合答進方顯謨閣直
學士大中大夫權刑部尙書俄得疾進徽猷閣學士京湖制
置大使歸還力疾犒師第其功上之病革日未死一日當立
一日紀綱引再興臥內勉以協心報國貽書宰相論疆場大
計尋卒於襄陽贈銀青光祿大夫累贈太師謚忠肅子范葵

重修襄陽縣志

卷之六

官蹟 宋

三

范字武仲葵字南

仲俱

有志事功每聞警報與諸將偕出遇敵

則深入諸將惟恐失制置子盡死救之屢以此獲捷嘉定十
一年金將攻襄陽圍棗陽方帥范葵往戰敗走之范紹定三
年爲淮東安撫副使討戮李全乃授京湖安撫制置使兼知
襄陽屬南北軍將交爭范失於撫御於是北軍內叛焚襄陽
禍至慘也言者劾范落職後卒于家葵紹定元年知滁州四
年授淮東制置使知揚州前後畱揚州八年拜右丞相咸淳
元年封冀國公薨謚忠靖

扈再興淮人有膂力善機變每戰被髮肉袒徒跣揮雙刃奮

呼入陣人馬辟易金人攻襄棗京西制置趙方檄再興等禦
之金人來自團山勢如風雨再興同宗政陳祥分三陣設伏
以待既至再興中出一陳復卻金人逐之宗政與祥合左右
兩翼掩擊之金人三面受敵大敗血肉枕籍山谷間既而益
兵圍棗陽相持九十日再興夜以鐵蒺藜密布地黎明佯遁
金人馳中蒺藜者十踏七八敵卻走金帥完顏訛可擁步騎
薄城再興縱之涉濠半渡擊之又令守壩者佯走金人爭壩
急擊之多墮水中金人初對樓鵝車革洞決濠水運土石填
城下再興募死士著鐵面具披氈列陣以待之金人計窮而

重修棗陽縣志

卷之六

宦蹟 宋

三

去棄旗甲輜重滿野再興又破順昌縣進攻唐州金騎步出
城迎戰金兵殲乃歛髑髏立人頭塚尋病卒

史嵩之字子由鄞人嘉定時進士調光化軍司戶參軍以主
管制置司機宜文字通判襄陽府紹定元年經理屯田襄陽
積穀六十八萬加其官權知棗陽軍三年春正月創置棗陽
屯田成以勞賞官兩轉五年擢京西湖北制置使會出師與
淮閩謀犄角嵩之力陳非計詔令嵩之籌畫糧餉嵩之奏言
臣熟慮根本周思利害甘受遲鈍之機思出萬全之計荆襄
連年水潦螟蝗極力賑救尙不聊生征調既繁夫豈堪命其

勢必至戶棄業以逃亡役夫中道而竄逸無歸之民聚而爲盜饑饉之卒未戰先潰正恐重貽宵旰之慮兵民陛下之兵民也片紙調發東西惟命然事關根本願計其成必計其敗若和好之與進取決不兩立臣受任守邊適當事會交至之衝議論紛紛之際雷同附和以致誤國其罪當誅確守不移之愚上迂丁寧之旨罪亦當誅迂旨則止於一身誤國則及天下丞相鄭清之以書言勿爲異同嵩之力求去自師潰帝始悔不用嵩之言嘉熙元年進京西荆湖安撫制置使遭父喪起復右丞相手詔遣中使趨行於是太學武學京學宗學重修棗陽縣志

卷之六

官蹟 宋

三

諸生黃愷伯等皆上書論不當起復不報卒謚莊肅德祐初奪謚

元

齊秉節字子度濱州蒲臺人父珪從嚴實攻歸德廬州有功授無棣縣尹攝征行千戶後兼總管鎮棗陽中統三年李壇以益都叛徵諸道兵進討棗陽精銳盡行僅畱羸卒千餘珪時兼攝萬戶府事與宋襄郢對壘敵來覘虛實珪城守周密以東門外壕狹小可越命浚之爲備已而宋將聶都統陳總管果率兵萬餘抵城東門以板渡壕壕廣板不能及珪率累

力戰敵退走城賴以完事聞賜金符真授千戶至元三年告老舉秉節自代秉節襲父爵仍鎮棗陽五年從伐宋築新城白河口堡鹿門山畧地郢州大洪山黃仙洞數著戰功七年陞上千戶權萬戶十一年從丞相巴延至郢由陸入江攻武磯堡擒宋將閻都統十二年元兵敗賈似道孫虎臣舟師於丁家州命秉節屯建康黃州復叛令秉節往討斬余總轄於陣十七年授明威將軍二十八年移饒州卒年六十二子英襲職

鄧思易字天祐大名清豐人至治二年令棗陽甫下車祇謁

重修棗陽縣志

卷之六

宦蹟 元

五

聖宮仰視殿宇弗治禮器亦缺焉弗具慨然興修葺之思亟謀諸紳士籌畫經始不期月竣工並置備各禮器歲率諸生行釋奠禮復爲文以記自是文風一振其爲政率以清淨不擾使民得耕商自殖以樂其生豈不誠爲賢長吏哉

王麒字麟輔太原人至正二年任涖事精勤公正不阿遠苞苴絕請謁一時稱爲廉平乘暇拓修公廨建譙樓於儀門外置漏刻以便趨事者知所興作云去官後民思其德礱石刊

志

明

吳子俊洪武四年知棗陽時大亂甫平公署學舍皆屬殘毀子俊於撫綏稍定之次銳意興作重修文廟建大成殿暨明倫堂名宦鄉賢諸祠又創修公署一邑規模於是大備又景泰三年蜀人夏亨字嘉會涖任重修大成殿學舍街道又勑橋梁於冷水溝優涼河民不病涉皆政之可紀者楊瑛羅山人成化七年任涂翀豐城人宏治元年任皆振興學校儲備倉穀不怒而民威不惠而民懷去而民思俱崇名宦祀有以也

王顯高字思謙綿州人起家進士宏治十三年知棗陽憂旱重修棗陽縣志

卷之六

官蹟 明

五

誠禱於神有束先生請雨之應士民謳之安邦確山人字維藩宏治十一年舉人正德五年令棗邑旣平其政覩其城委土私憂之於是聚長老而謂之曰忘羊而不補牢厝火而臥積薪可謂智且安乎且河南盜起難作將奈何諸長老莫不願請方畧乃率其子弟捐金爲倡增陴培基加於舊者三之七更營警舍而嚴更柝無何七年春盜渡河南侵驅鋒銳來薄城邦區分僚佐招募勇敢相機距守厯二十七晝夜卒完其城復奏記臺使甃城以磚報可邦乃授計父老董其役凡三閱月而城成而猶偵以遊徼設以門候四境庶得安堵邦

治邑故多叢謝篆去民戶祝而戶頌之請祀名宦

王應辰字瞻極又號懷山信陽人隆慶二年進士萬曆元年知棗陽縣事其政教可書而最洽民隱足當長吏之賢能者爲清查地畝均糧法先是清丈地畝之令下前令未竟其事卸任去應辰至遂竟其事西暨梅城東暨雙陴南暨車橋北暨寺莊得地一萬九千六百餘頃而民占軍屯不與焉乃均上中下三等派輸合二稅上地每畝三合七勺中止一合八勺下九勺四抄其城闔關廂店市處以絲絹當之舊額頓加新派有等中外咸稱其便又查民田中隱匿者得數家薄使重修棗陽縣志

卷之六

宦蹟明

三七

納銀購田三百餘畝歲租所入儲給士之貧乏無告者又以城南門逼近文廟移出丈許隨復增高城垣五尺修葺學宮勅建明倫堂樹科甲坊於前斯皆拊循有術聲教滂敷表表足式者也崇祀名宦不亦宜乎

王之翰絳州人官棗陽知縣萬曆二十二年命御馬監陳奉徵荊州店稅兼采興國州礦洞丹砂又開礦棗陽之翰以顯陵近執不可奉劾之翰及襄陽通判邸宅推官何棟如緹騎逮訊是時武昌兵備馮應京疏陳奉罪帝怒除應京名俄以都給事中楊應文論救遂並逮應京下詔獄三十九年星變

修省廷臣多請釋繫囚於是應京及宅棟如獲釋之翰先瘕
死天啟初追贈光祿少卿祀名宦

王國甯汲縣舉人萬曆四十一年宰棗邑清正慇直每謁郡
大夫凡有關民命者爭之力必得請乃已更喜接文士月兩
校課手自評隲大要患文過掩質而無當於實用學者宗之
邑之宵小無賴有犯者悉按法不貸皆望風自輯云

任贊化字參之聞喜人天啟二年進士三年除嘗曰治邑者
去其害治者而治興矣會奸胥偽增科條斂民卽按其罪又
邑有杜某者尤無賴廉問卽寘諸法由是恣橫匿迹而禮讓

重修棗陽縣志

卷之六

宦蹟 明

六

興學校澆風亦不釐而正未及期以治行稱最遷景陵去士
民攀畱弗得乃建祠於邑治之南俾歲時俎豆用昭其德以
明敬陳大道祠記有謂其俗惡不問惟問倡邪者何人賦煩
不問惟問僞增者何人蓋紀實也

管天衢臨川人天啟五年任寬猛相濟尤加意文人如袁煥
嚴繩光皆青年異材天衢咸首拔之後皆以文章經濟顯報
最擢廣州通守袁宗伯詩以贈行有句云民皆失所怙公亦
視如家清白吏之風可想矣

吉星燦韓城人崇正二年進士金九陞全椒舉人皆以賢能

著聲星燦五年卒於任九陞內擢後位少叅郭裕字貽謀清江縣舉人十三年甫視事張獻忠攻棗陽時左良玉屯近邑裕單騎往邀禦賊賊卻退十五年十二月李自成陷襄陽令其將劉福率眾攻棗陽裕發砲石擊傷賊無算賊憤攻益力城陷身被數槩大罵賊支解之闔門遇害

國朝

劉我翰興縣拔貢生順治三年任時當離亂之餘設法招集流移除暴安良條布功令而蘇卹釐正與民休息任滿遷慶陽去

重修棗陽縣志

卷之六

官蹟

國朝

五

柯聳字岸初嘉善人順治六年進士七年涖任棗故襄屬僻邑可不下堂而治惟草昧朔革安集不易復值大軍駐郡徵派豆草並派造戰船聳洞悉民艱乃奏記祖制府其畧曰本縣一歲額糧不過三千六百八十餘石今數番料豆已踰五倍自今小民析骨難支下吏嘔血無地但軍書旁午需餼方殷若不據實上陳深恐息肩無日幸逢憲德如天望恩籲苦懇祈軫念民瘼恩賜寬恤其修戰船議陳其不便有四又利利病對及聲明帶荒艱苦皆康時濟世之大經俱載藝文聳徐以其拊循餘力建學舍課絃誦於時文風一振四境亦鮮

梗化之民治行稱郡屬最膺薦內擢邑人立祠祀焉至今弗
衰十三年聞喜貢生崔爾瞻政維從舊民賴以安擢牧永寧
舊志稱其長厚云陽德生新建舉人康熙元年任雅意造士
於城外立義學二所召諸生肄業其中置田三百餘畝以資
膏火公閒卽集生童講學去任後士民卽就義學祠祀

政治前繼柯聳賢良垂耀後來者康熙三年進士閩中劉嗣
煦字飛鳧棗陽率平行忽有虎患嗣煦禁人捕之虎亦自去
而患息夏大旱跣行赤日中虔禱輒應念而雨時當編審地
糧他州縣以溢額爲功嗣煦獨悉心細核逃亡戶口盡爲豁

重修棗陽縣志

卷之六

官蹟 國朝

三

免以滋生人丁充之不缺額亦不累民公私便之時大軍討
吳逆徵芻挽糗無虛日嗣煦措解無誤嘗兼攝鄰邑邑人輟
耕耦語曰是安得去棗而真除吾邑棗民間而爭之曰果爾
於汝計得矣吾邑將奈何其得民類如此廉俸所入每出以
修葺學宮復建魁星樓於巽位樓北又建青山書院教博士
弟子員以制舉業又創修邑志及城隍祠與據勝樓諸勝役
不干時費不累民前令未之有也後內擢入都邑人士思而
尸祝之或曰昔齊人思其相慶燕人思其守布嘗立生祠若
其舉燕齊故事爲一祠與柯公相先後不愈於私爲位乎眾

唯唯擇地而爲之祠又建百子堂以頌其振繩云嗣煦康熙七年任論者謂順治後令棗以嗣煦稱首焉

劉首揆廬陵舉人雍正四年涖任沈孟堅德清人起家進士十一年知邑事首揆持已清介尤善折獄致政日民不忍別孟堅慈祥愷悌培養士卽都察院舊基爲育嬰堂旋調繁民爲立去思碑

徐芳桂字攀士浦城進士乾隆九年涖事一切不便於民者咸革去之嘗以棗陽科名寥寥毅然思以振興乃刱建春陵書院捐俸市田數百畝資肄業生童膏火董師儒時勤考課

重修棗陽縣志

卷之六

宦蹟

國朝

三

十二年丁卯當鄉試仲春之夕夢皂衣人下自譙樓告曰汝縣今科當舉二人醒而異之是秋調充同考官比填榜果舉二人爲黃嘉瑞李爲柯至誠之感何其神也旋任卽更新譙樓顏之曰夢魁自爲記後調任漢川邑人刊去思碑以誌愛戴

仙遊舉人黃通理常寧進士張載遠乾隆十七八年前後任十七年荐饑通理捐廉煮賑爲富民倡全活甚衆十八年沙河陡漲護城石隄衝坍過半載遠上請捐修未及行調枝江去皆有可稱述者

黃文瑗字玉亭巴陵舉人歷任劇縣有聲乾隆二十一年除興利鋤害勇於有爲縣城築近沙河恃隄爲固壘經漲刷殆盡城亦因而剝落前令屢議修復未果文瑗集邑父老勞之曰漲非隄不可殺盜不城何以拒耶今爲若屬籌之審矣乃周視城垣相度河勢從順城灣至大東門壘石纍土成護城隄數百丈又於水之砰擊要害修石磯二處由是水歸正軌前患遂止二十三年補葺城址建樓崇文門上左修文昌閣右建圖南門像三能拱衛聖宮又檢前令劉嗣煦所修邑乘重爲纂輯事未竟遽以病卒士民痛之建祠於西街或圖其像以示不忘焉

甘定遇字見龍奉新貢生乾隆二十四年任下車後釐剔積弊園牆荆棘吏役緣以需索除之不以擾民沙河渡爲往來孔道每遇夏秋漲溢行旅阻滯定遇捐置板橋長五十餘丈復修備渡船二隻以濟緩急又慮及船橋歲修與船夫口糧更捐市腴田六十餘畝歲收租用充經費久遠賴之復乘暇踵成邑乘梓後膺上考去士民恆思念之